

21 MAY 2001

Sukan-Sepak Takraw (Saidin)

SAIDIN AKAN JUMPA PEMAIN BAGI SELESAIKAN PERGOLAKAN

BANDAR PUSAT JENGKA, 21 Mei (Bernama) -- Presiden Persatuan Sepaktakraw Malaysia (PSM), Datuk Saidin Tamby akan berbincang dengan para pemain skuad sepak takraw kebangsaan dalam usaha menyelesaikan masalah yang berlaku antara mereka dengan jurulatih.

Saidin berkata beliau percaya masalah itu boleh diselesaikan dengan baik kerana ia hanya berpunca apabila corak latihan keras yang diperkenalkan oleh jurulatih Ismail Ahmad belum dapat disesuaikan oleh pemain.

"Jadi saya akan berjumpa dengan mereka dan berbincang. Tidak ada masalah yang tidak boleh diselesaikan," katanya ketika diminta mengulas mengenai laporan sebuah akhbar Jumaat lalu mengenai pergolakan antara pemain dengan jurulatih skuad tersebut.

Laporan itu menyebut pergolakan itu berlaku disebabkan segelintir pemain terutama pemain senior tidak berpuas hati dengan ketegasan dan corak latihan keras yang dikendalikan Ismail dan pembantunya Nordin Sabarudin sejak Januari lalu.

Saidin berkata beliau dengan Setiausaha Agung PSM Syed Yazid Syed Abdan akan mengadakan pertemuan itu dalam minggu ini.

Beliau percaya para pemain mempunyai semangat yang tinggi dan tidak akan mengambil mudah persiapan menghadapi Sukan SEA yang akan berlangsung tinggal tidak sampai empat bulan lagi.

Ketika ditanya mengenai kemungkinan masalah yang berlaku itu akan menyebabkan pemain menarik diri di saat akhir, Saidin yakin perkara itu tidak akan berlaku.

PSM melantik Ismail dari Angkatan Tentera Malaysia (ATM) sebagai jurulatih pada Januari lalu bagi mengendali fasa terakhir projek Gemilang 2001, menggantikan Zainuddin Kamaruddin yang menarik diri atas sebab komitmen kerja.

Pemilihan itu dilaporkan adalah berdasarkan pencapaian baik pasukan ATM di bawah kendaliannya selain bekas perejam negara itu juga adalah jurulatih terbaik dalam kursus dan ujian yang dikelolakan PSM.

Dua lagi jurulatih skuad kebangsaan ialah Nordin dan Mahat Adnan.

-- BERNAMA

HIS MOZ